

Bummel 2019 Alti Garde (Hörnli Gottsagger)

Liebi Druurgmaid

Zer Abdanggigsfyyr hit an däm Ort
richt y an eich gärn e baar Wort
Y ha das Ämtli vo unserem Glyggefarrer iibernoh
will är an sy Fasnachtsbummel het miesse goh

Mir empfinden alli diefe Schmäz und grosses Laid
D MUBA und d Fasnacht 19 sinn Vergangehait
D MUBA, die het fir alli Zytte unsri Stadt verloh
Zem Gligg wird d Fasnacht wider ufferschtou

Was duet ys vo däre Fasnacht in Erinnerung blyybe?
Was diemer in den Anaale driber schryybe?

Dr optisch Ufftritt duet s Sujet träffend erklääre
är verbraitet e makabri Lyychezigli Atmosphäre
D Goschdym mit dr Aura vom schregglige Tod
Oobe lyychebleich, unde flammends Gääl und Rot
Vom Tambourmajor isch numme no s Skelett vorhande
D Herner, die hänn d Hornkueh-Initiativen iiberstande
(und dr Niggi d Fasnacht au)

Ai Ziel hämmer aber laider knabb verfäht
Ai anderer Glygge het s glych Sujet gwählt

Zwai Daag lang het ys dr Tod ganz nooch beglaidet
und trotzdem het ys d Fasnacht vyl Spass beraidet



Zem Byspiil am Zyschdig in der Myysli-Falle
het s mäggen Altgardische rächt guet gfallte
Oder aine (y glaub, dä isch ganz lyycht debyyl)
zaigt sich als Halbschueh mit wenig Profyyl

Wie sich am Bummel das so schigglig gheert
wärde die wo mitgschafft hänn gebyrend gehrt
Zerscht d Sujetkommission mit ihrem Obmaa Hinde
Die wytere Protagonische lehn sich lyycht finde
Zeedeldichter, Kinschtler, Schnydere, Ladärnezieder
(traage duet me die halt nimm wie frieher)
und no vyl anderer, au dä wo s Material verwaltet
Die alli hänn e tolle Zug kreierte und gschtaldet

Für die mecht y an däre Stell e Lanze bräche
und ihnen alle my verdiente Dangge uusspräche
E Merci au em Blaggedden Eschthi
Du bisch in däm Job halt die Beschti

Mer hänn drey Daag lang alles gäh
doch hitte miemer Abschiid näh

Bim Schlussstrich uff em Seibi noo de Zähne
vergiessemer noone baar Abschiids-Drääne
Dr MUBA sage mer denn ändgiltig tschau
und der Fasnacht 19 s glychen au

Bis s näggscht Jahr denn am 2. Merze
do diemer wider pfyffe, drummler, gässle, scherze

Mit Wehmuet klabbe mer dä Deggel zue
Frau Fasnacht hesch e Jahr lang dyni Rue